

**V**il sint von worten wyse vnd klüg  
 Sie ziehen doch den narren pflug  
 Das schafft das sie vff ir wyßheit  
 Verlossen sich vnd bschydikeit  
 Vnd achten vff kein frömden ratt  
 Bis in vnglück zu handen gat  
 Syr sun **T**hobias allzyt lert  
 Das er an wysen ratt sich kert/  
 Dar umb das nit folgt guttem rott  
 Vnd den veracht die hussfrow Loth  
 Wart sie geplagt von got dar von  
 Vnd müst do zu ein zeichen ston/  
 So Roboam nit volgen wolt  
 Den altten wysen / als er solt  
 Vnd volgt den narren / do verlor  
 Er zehen gslecht / vnd bleib ein dor/  
 Het **N**abuchodonosor Daniel ghört  
 Er wer nit inn ein vier verkört  
 Machabeus der sterckest man  
 Der vil groß tugent hat getan  
 Hett er gefolget Jorams rott  
 Er wer nit so erschlagen dot/  
 Wer allzyt folgt sym eygnen houbt  
 Vnd guttem rott nit folgt vnd gloubt  
 Der acht vff glück vnd heyl ganz nüt  
 Vnd will verderben ee dann zytt  
 Ein fründes ratt nieman veracht  
 Wo vil ratt sint / ist glück vnd macht  
 Achitofel sich selber dot  
 Das Saul nit volget synem rott

